

後能自主亦在人自好而已自好之心篤而後能自圖孰得孰失何取何捨宜如之何決擇焉此第七節總結上文七者復之期也百者成數也引而伸之其義畢矣孔子曰小子聽之清斯濯纓濁斯濯足矣自取之也已酉季秋念芝識

楊園先生全集卷之二十一終

楊園先生全集卷之二十一

海寧後學陳敬璋輯

傳

邱平叔傳

邱允琦字平叔與顏統士鳳同里王父廣文君以明春秋貢禮部凡鄉之春秋得舉者皆習廣文君說平叔世其業獨不遇負性耿直意所不可鬚髯戟張遇事慷慨無避忌以是士鳳少長交於平叔雅相得崇禎癸未士鳳卒乙酉七月顏氏家難作持杖斧呼殺人以入士鳳長子鼎受從嗣祖太學出走羣兇將及平叔開門迎之曰無害吾能率

鄰里以遏羣兇逡巡散去越三日連雨使人乘夜往顏氏故居收得遺貲若干資太學祖孫避禍崇德崇德人鼓之訟大起予問過平叔語之曰戎馬之後睚眦相賊殺平日衣冠之族胥豺虎噬也故人骨肉苟無恙家奚卹君仗義蓋平厥難乎平叔奮發曰顏氏老弱所不死者間豈小忿當念懿親乎予曰春秋之法不以亂易亂君童而肆之者平叔俛首良久曰顧懲忿實難耳丁亥冬盜劫其室執平叔擊幾斃加之以烈火膚無完者盜去漸蘇太學聞急命醫致藥物創尋愈然精力以盡遇熱奇痛發無何沒年四十有一友生急難至隕其生悲夫

倪寄生傳

倪露字寄生湖州人其先倪思宋寧宗時仕至尙書以直節稱寄生爲人峭直於物無所好好讀書游佳山水年三十歷試奇聞神僊之事遂學神僊幾至死見僧智河則學浮屠蔬食苦坐參究無生亦幾死自以爲有所得已乃學道於浮屠之習未能去然稍別矣每出以書自隨緡閣往復祁寒盛暑不輟當意歌舞或永夜獨嘯不知其他有期登山者疾必往往必窮其幽不避豺虎三遇虎不食興至獨往嘗數日不返家之人大惑以爲不得返也已而返則自喜以是吳興山水無目不及者嘗渡錢塘觀五洩歷天

台雁蕩間兩游南海觀日月出入與閩人劉某約將市使舟往海外諸國會劉死不果當是時幾死者亦數得生游益奇危崖巖壁人跡罕至莫不猿猴登而飛鳥集也晚復游閩有閩游諸記歸登江郎山坐臥其下歌白駒之章數闕不忍去渡子陵灘雪且久強一僧登之凍風所觸僧輒死移時而蘇寄生樂方盈沿江狂走十有餘里其嗜奇類如此與人交多不合合者至死不異見過面折不少隱故世俗亦畏與之交凡朋友所贈遺雖貧不爲他日計鄰里宗族之貧於寄生者與之兄弟死者葬之其無妻則爲之妻年五十二卒卒之日益無以殮也惟書數百卷及所著

游記數種而已鄰里宗族因信其貧云先是數年甚言天下當亂築室太子塢將老焉以閩游不克居甲申京師潰江南多事蓋如其言

張氏曰子初讀經鋤堂著而志之謂子孫當有存者及友寄生見其行已有文節風惟論學每異比不異而寄生死矣悲夫

陸母倪孺人傳

聖賢之道無他焉正已俟命依乎中庸而已子表妹沈適陸子講輿簡其先姑爲倪孺人孺人生於士族幼字陸及笄夫失明陸使人辭某之子失厥明不得嗣爲兄弟倪不

可陸固辭且曰夫者婦所賴以終身廢奚賴焉父母欲聽之孺人微聞其事歎曰女子許嫁纓明有所繫也復他繫不可且瞽命也婚何宜絕旁人未諒厥志勸勉之廢寢食者五日猶未之諒則求死由是無敢復言更字者明年嘉禮成壻車在前婦車在後男侍者相厥男女侍者道厥女里人來觀如堵垣入門拜於祖舅姑祖舅姑拜之拜於舅姑舅姑亦拜之當是見者無不歎息至泣下自其爲婦躬操作勤織紉閨門之內雖離如也家雖貧沒齒無怨相敬愛蓋二十年如一日云及卒屬其夫子曰始者事君謂得終君身不圖先死君資人養子幼宜再娶毋以喪制故緩夫子重其義繹居以老子長爲之娶婦奉烝嘗焉人謂古有娶瞽女稱道至今者孺人之死靡他以從瞽夫其事視昔尤難予謂若夫若婦可謂各得其道矣然特庸行之常無如及之者罕從而震異之夫其始之字於陸也父母愛之固將富貴之也及長而目廢旣拂其初心若遂辭而聽不恒其德矣使陸不瞽得肆力詩書其必富貴乎從而他字未必優於陸也世之人徒失身而貽後悔不少故曰不知命無以爲君子且婦人之道從一而已宜家人宜室家而已今也入其門尊卑長幼胥敬愛入其室琴瑟靜好偕老而靡咎怨于歸之吉孰大於斯雖沒世名不稱固無憾

子故樂爲之傳一勉表妹勤脩婦道以嗣徽音亦勉陸氏子孫懋進德義毋忝厥祖云

墓誌銘

大學錢先生墓誌銘

大學厚菴先生姓何氏諱福徵字君除厚菴其號也世爲海鹽人八世祖貴四洪武中成貴州都勻衛以幼子託於錢子孫貴盛遂爲海鹽錢氏曾祖諱薇給事中卹贈太常少卿妣孫氏封孺人祖諱與映舉人妣俞氏陸氏父諱周中書舍人贈戶部員外郎妣馮氏贈宜人萬曆丙申七月二十七日生先生於嘉興舟里里乙酉之亂遷於海鹽之

彭城里遂終焉爲人孝友敦誠行義勇敢初予未知先生交先生兄子汝霖因延課子時先生年六十五鬚髮皓白衣冠偉然子甫十齡教之嚴而有方始至問教術對以先儒云子弟輕備教以經學念書不令作文字旁人以爲非先生不顧也予歲館其家見其立身謹然諾由矩矱閨門之內整整如也宗族怡怡如也於親舊時其往來箴其不及於鄉黨卹其飢寒同其憂患與兄子居同於父子視兄孫同於祖孫祭祀必盡誠敬備物必思所嗜忌日必哀擗禮必恭恪服食必儉素而豐於賓客臨財不吝而物力必惜無事矯飾而取舍必嚴述師傳之訓言及先代遺事必

垂涕御臧獲雖小失必戒而皆有恩意竊歎世無厚德老成爲後生楷式俗流佻薄不可振底若先生者殆其入矣予以是雅敬先生先生亦過以予爲忘年友因從所親訪其少壯時事則事親能先意盡其歡心嘉言懿節終身不忘與弟治極親愛疾痛疴癢有如一身撫庶妹如己女蚤寡歸養於家及卒爲之合葬又撫其孤女遣嫁如初少負高志博習親師參政劉公泓鄉進士方公成位銓部金公麗兼成器異之自授經以往敦誼至死未嘗稍衰方公蹇士以庶妹妻其子則其一節也萬曆甲寅周公延光視兩浙學政奇先生才拔附秀水學天啟乙丑入南雍司成羅公喻義禮以國士當是時逆璫魏忠賢亂政毒流搢紳有樊生者諂忠賢創建祠國學議先生風羅公緩其事生將中公以大獄先生危言論之陰遣歸楚禍以不作未幾璫敗所全甚多先生爲當湖姚公館甥姚公歷任法曹晉司寇崇禎初讞獄稱平先生實左右之每有平反不以告人固無從知也故交李某負富室金先生與知爲之償終不一言於李新安汪某嚮與先生兄弟通財汪死訪得其子歸之金曰予兄弟嘗負而翁金今還若子弟亡無後予與兄子事也其子恂悅出意外感泣而去其慷慨赴事沈深有度類如此試累蹶不遇於時年五十作知非草堂於

所居之西偏而休焉自是豪邁之氣悉斂矣甲申三月聞
變極悲憤明年遂去舟里卽凡子居居之德以益進先生
體素脩瘠至是優游鄉井親賓過從論道誼砥德行膚革
充盈精力至老猶盛云癸卯七月寢疾心志炯炯疾革乃
命兄子率其子齋戒越三日入祠告終於厥祖厥考身被
冠服臥而致其誠焉既畢以子及家政託兄子以教事託
親戚孝廉巢子鳴盛文學屠子安道及小子履祥自慰曰
沒而寧庶其在此乎又五日而沒蓋九月十八日也距生
年六十有八配姚氏司寇公士慎女十七于歸惠和有婦
德後先生三歲七月十七日生先十五年十二月初六日
卒子二汝賢殤汝中聘巢氏女三長適松江國子生姚世
靖次適嘉興屠子安道俱孺人出一幼未字與汝中同妾
葉氏出妾二李氏葉氏先戊戌九月朔葬姚孺人於澉涇
荆山之陰乙巳十二月初五日奉先生櫬合葬焉銘曰
維德之厚木于孝弟維德之進勇於知非厥非有覺職是
焉趨孝弟允篤乃慶之貽蒼山峩峩永瞻望兮澉水洋洋
寶襟期兮先生之志子孫世世其無違兮

吳子仲木墓誌銘

吳子仲木諱蕃昌八世祖胡諱忠者自天台徙澉浦易姓
吳族益大遂爲海鹽吳氏大父司寇公諱中偉熹廟時逆

璿擅政致事爲完人王妣顧氏封夫人父太學諱麟趾蚤世無子以仲木嗣妣董氏胡氏查氏仲木故忠節公仲子忠節諱麟徵以奉常殉國難贈少司馬伯父中丞公諱麟瑞人品政事重一時世所稱東海兩吳先生者也仲木幼穎異能文年十六補邑諸生歷試高等不遇崇禎甲申寇陷京師忠節公死之仲木出入江淮戎旅間迎喪以歸身營祠葬之事旣畢遂棄諸生業矢不仕虜肆力詩文閎博偉特方古作者撰忠節公年譜自敘其後以見志嘗師山陰劉先生念臺癸巳以後益友先生之門人與諸昆弟講求程朱正學務見諸躬行作日月歲三儀以自範又爲闔職三儀使家人遵守焉事嗣母查孝敬盡禮及居其喪水漿不入口四日旣殯食粥不茹菜果寢苦居廬不脫衰絰比葬嘔血數升哀毀不忘仲木故多病至是彌困逾小祥卒於喪次屬纊前一日猶與諸弟論學不輟遺命殮以衰服葬考妣墓先是太學公沒序宜中丞公仲子謙牧爲後幼故以仲木嗣謙牧因歸繼產二百三十餘畝仲木不受遂相讓爲義田立宗祠教養族人其他忠信友睦事不具述娶鄭氏蔣氏李氏子男二恬貽妾沈氏出恢貽妾金氏出女二隱貽沈氏出配蔣馬錫憐貽妾倪氏出配查光嗣以丙申正月乙巳卒距生年天啟壬戌六月十八日凡三

十有五以丙申年四月辛酉合二室葬於永安湖北雞籠山蓮花峯之側邇其先四世壟以履祥同學屬志其墓不克辭銘曰

永年非壽永道爲壽惟日孳孳德義時懋命賦有恒志業未究哀彼期耄徒焉叢詎朝聞斯寧亦胡云疚萬古湖山式瞻厥後

吳子哀仲墓誌銘

文學吳子哀仲諱謙牧號志仁海鹽縣澈浦人故中憲大夫巡撫偏沅都察院右僉都御史吳公諱麟瑞之子母朱氏封安人崇禎甲申中憲仲弟太常贈兵部侍郎忠節公諱麟徵殉國難中憲慟哭家國寢以成疾明年亦卒兩公忠勤廉直顯聞朝野相繼隕喪箕裘之任蓋誠難之哀仲甫成童克樹立弗替其家學弱冠遂棄諸生業整身勵行期爲聖賢之徒事朱安人以孝聞教率孤姪曰夔爲龍一出於正誼門內並敦義讓戊戌居安人喪杖不能起越二時疾稍起手編中憲遺文若干卷困復甚扶疾治安人窀穸哀動行路哀仲體素羸至是益不自勝遂以己亥正月初五日卒於喪次距生崇禎辛未十月朔年止二十有九先是七載予過海上弔忠節祠因訪仲木於澈浦始與哀仲遇未相識也予與仲木言且久哀仲拱而聽無一語從

西行三十里宿於乾初陳氏來朝予去之會稽哀仲返友人朱正思述其言是日悵惘若失云自是相往還繼以書問至卒歲月無虛焉其爲學初入於釋老既盡去之致知存養悉遵程朱之教病世之學者好言生知安行輕自大而卒底於無忌憚因以困勉名其齋朝夕從事焉自經史百家以及律歷輿圖民俗國政凡儒者當知之事無不遜志以求尤以東京名節鄒魯德行爲歸鹽官海澨僻壤澱城荒寂大海環其左湖山聚其右哀仲以名臣子姪翹楚鄉邦朋游文藝之樂雖亂世猶足娛情而獨退然肥遯以行誼道德皇皇於懷豈非豪傑之志蚤自興起者乎或者病其矜己異俗好爲名高夫以哀仲敏智出其才豈不足壓羣眾使苟徇流俗之論同於少年徵逐大命猝至宛其以死蓋棺而後久同草木之腐何一善之足述乎予故於哀仲視爲畏友哀其蚤世而惜其學之未至於大成也然於二氏之說嘗已探其源流乃能脫然反正不爲濡首可謂卓爾也已哀仲之兄孝廉晉晝及從兄壯輿蕃昌蕃昌卽仲木也文學志義俱有聞於時俱先哀仲沒其年俱不永豈山海之秀萃於一門暨乎代謝亦遂一時幾盡乎哀仲志篤而願宏雅不欲一節自命平生臨財廉與人厚其爲義勇敢其交友能愛人以德其處宗族昏姻鄉黨能率

人以善諸懿行不具述所著詩文若干卷均有裨世教非苟作者藏於家配朱氏海寧縣貢生朱朝琮女子男二晞淵字元服配徐氏秀水縣諸生徐善女景哲字孔與配董氏海寧縣諸生董世昌女女一適海寧許全可之子植以丙午春仲卜兆永安湖紫不護山之陽其猶子曰夔請銘於予因不忍辭爲之誌銘曰

千古之志一邱藏篤信好學銘以章降年弗永行則芳爰覺後裔視周行嗣續厥德休有光

事略

同學紀略

先師門人在浙西者今日或存或亡不可盡考如錢塘沈甸華昀原名蘭先海寧祝開美淵陳乾初確原名道永海鹽吳仲木蕃昌行履姓氏皆人所共知其或肥遯潔身守貞沒齒或降年弗永抱志先凋雖名姓不聞於世而實無玷師門者得四人焉

鄭弘字休仲嘉興海鹽人端簡公會孫與弟景元字阮公俱試諸生有聲譽性英敏善文不羈小節而篤於友愛弘蚤從先生執弟子禮崇禎壬午乃以其弟及門受業比歸先生爲文壽其母景元短世乙酉後絕意進取躬灌園蔬養母屢空晏如敝衣草履不以屑意嘗徒跣行雨中人不

能識也遇親舊逐喧者亟避去數與往還二三進士而已
卒年五十六

屠安世原名申嘉興秀水人十二作螢賦父孝廉見而異
之廿一聞先生講學喜曰苟不聞道虛生何爲以厥祖侍
御英風紀異爲贊而內拜焉先生勉之曰著實思維著實
踐履把身心整頓起來臨行復命之曰子名臣之裔果有
淵源行矣努力然科名之心未忘也先生旣沒遂棄科舉
從父兄偕隱於海鹽之鄉病作不粒食者十有七年得先
生遺書力疾鈔錄反躬責己無時或怠嘗曰朝聞夕死何
敢不勉卒年四十六

錢寅字士虎嘉興桐鄉人祖嘉猷游太學事涇野呂先生
稱高弟幼孤母胡撫之自總角與履祥爲研席交及長志
尚不羣雅自期負文行嘗欲過人癸未冬孝廉祝淵被逮
北行與祥送之吳門淵致書還報先生時許都叛金華江
路梗塞次年正月都授首遂偕祥造先生受業焉先生始
固辭連日請益先生色喜稱其質近自然乃得內拜自是
造履益謹無何亂作二三年間寇盜充斥亦不廢學卒年
三十有四宗族鄉黨咸悼惜焉

邱孺人節行略

邱氏先輩廣文麟山女適同邑莊君十有九而夫死子生

一年家貧舅哀甚疾不能起而姑又父之女弟有父之親有母之尊不忍以夫故傷其身憂及舅姑且替其子也節悲哀勤絰織以事舅姑舅廢疾數年不失養具束脩之禮使子就外傅日先業不可失也學不力行不修泣諭而不怒雖怒不加杖舅沒姑老疾奉侍湯藥不懈終其姑如事父母子既長爲儒學弟子員宗族高其行將請學使者旌禮之邱氏聞不可曰婦人常事耳何爲使人聞之今六十餘康寧勤服婦功不異少時遇子孫行語具合古訓溫辭緩色聞者油油然蓋其德性有過人也

張公節烈事略

張公焜芳字九山越會稽人崇禎間官至給事中建言被謫癸未冬赴翰林孔目之命時薄京師河北震動士大夫北進者紛紛而南公曰君國有急臣子之義有進無退趨行次臨清與其監司郡牧爲城守計事未集而城陷遂死焉天子嘉其節下詔寵錫有罵賊不屈節烈可嘉之語次年春子至越爲弔其閭嗣子某奉狀以乞言予惟朝廷言事之臣不屈於賊事在國史草茅賤士敢有述辭之請以再未有應也而某亦以丙戌之秋死於亂今年復至越自慚久負諸責於九原也妄爲之書而附論之曰古人有言平時無犯顏敢諫之士則臨難必無仗節死義之臣予讀九山疏草

言議侃如無所避忌而先師亦嘗稱其風采且言晚登仕階不輟學問嗚呼忠孝節義夫豈一日之事哉

先考事略

嗚呼履祥其忝所生矣先君諱明俊號九芝補本邑增廣生員孝友仁厚事上接下罔弗溫恭不幸蚤世人皆哀之祥兄弟幼孤不逮事言行不能具述間從故舊及門得其一二有曰萬厯壬子以母疾不赴鄉試乙卯戊午再試浙闈不遇雖久病數學不輟又曰遇親友吉凶曲意周卹不計有無教弟子家貧不登其贄又曰一日至邑見故家子通賦被械出囊金爲之輸而釋其械又曰平生持一語自

勗云行己率由古道存心常畏天知臨沒以不得終事親報舊德爲恨卽是思之概可見矣先慈沈無祥兄弟二人妹一人勤劬教誨婚嫁而卒自飲食寢興及行步出入及立身爲學無不諄切教戒延師締婚必先君執友中求之束脩諸費惟蠶績是賴紡木棉夜分不寐每泣諭曰人惟此志孔子孟子亦只孔孟兩家無父之子惟有志向上便做到大聖大賢汝若不能讀書繼志而父九原安得瞑目祥兄弟以是凜凜先訓不敢有忘崇禎己卯令君盧公采鄉黨同庠公論表先慈賢節扁於門曰鄒國遺風後因顛沛疾疢志行弗克紹於前人倘愷悌君子旁聞幽微矚其

本末或錫片言以垂不朽世世銘德家兄名履禎與祥皆

邑諸生

璋案九芝公事蹟略見舊嘉興府志本傳 又案先生年譜九芝公卒於萬曆四十六年正月十九

日年三十七沈孺人卒於崇禎四年六月十八日年四十五

遺事

徐孔坪遺事

徐孔坪紹興人神宗皇帝朝以國子生為遼東經歷時邊師議割寬奠款■寬奠者地小而要其於遼東猶下陽之於虞號也議既成■勒馬其地指顧河山已有目輕全遼之意朝廷以安邊功封蔭文武大臣邊將至侯伯孔坪感憤賦詩曰曾聞闕土始封侯割地何緣賞更優回首祖宗

爭戰地膏腴大半屬■頗聞中朝受爵者慚而惡之然未敢顯罪也未幾大璫鎮遼者生日御史宴之出其姬以壽大璫喜酬之千金當是時凡官遼東者莫不稽首稱賀孔坪獨不往賦詩曰傲吏從來懶折腰憲娃何事并封貂只因欲覓千金價甘效章臺獻阿嬌御史不能堪以貪墨罪之然孔坪聲稱因是益重既失職猶留遼東數年頗以詩文自豪云孔坪失其名

張氏曰世言隆萬以後人才多不逮昔蓋未之信若孔坪者予不詳其生平人亦罕稱道之獨所傳遼東二詩才識已見使其得志謀人軍國肯以朝廷疆土媚■自枉以求

利哉乃位不過經歷尋以罪去天下事可歎非朝夕之故矣

錢先生遺事

悲夫適遠者懷舊鄉老至者哀往日自古人情靡不如斯子顛躓喪亂甲乙再周齒髮變矣歌哭靡端念里中少壯交惟錢子一士尙存往歲仲春錢子過予示以先公之狀而曰嚴君棄世日月以長子得無一言乎予受而讀之曰詳哉可無述然祥之懷也亦何能已因本見聞所逮識其一二俾後之人無忘厥概云先生諱濤字飛雪與予家相距五里而近少孤奉母朱太君愛敬咸至太君厚於德居家三黨之親靡有不篤先生善承之有餘不足悉非所計教子姪心力兼盡一士嗜書史善文章自記誦以往先生禮聘名師盛陳簡冊晨夜鼓勵蚤起肅衣冠問課業晚坐書室師就寢然後寢率以爲常是以子姪弱冠輒有聲藝林太學螺潭公先生仲父也嘗事呂涇野先生敦尙行誼先生孤之日太學視之與子文學君同學同師友同日冠同時婚以至飲食衣服罔弗同者及太學父子繼沒而先生視其遺孤澹汾及孤孫寅綜家政禦外侮細巨畢舉益勤教事使詩書之澤弗替益光一若太學公所以視先生者里人由此多其孝義予成童與一士及无寒汾字虎寅

同學登堂拜朱太君太君語先生曰張氏子孤汝其念昔無父之日哉故先生視祥有如子姪師他出太君入學舍聞讀書聲則甚喜先生或在前或在後無不從者令一婢奉果餌以隨太君徧賜諸幼撫而去子母愉愉如也太君一女字於沈而殤女太學公女適崇德姚氏蚤卒先生教育其幼子夏至成立又選士族嫁其孤女二人沈再娶於陸陸無子寡居太君憐之往來比女子子先生曰寡婦之子非有見猶弗與友況其身乎非親母親兄而亟相過畏人之多言因辭之其後惟以使命聞遺陸以不至太君嘗病瘧且滿三歲先生侍醫藥憂不解年未艾鬚髮盡白最

後得良醫太君起康強加昔若天所祐然予年嚮壯先生招延使課少子禮敬與昔諸老師不異凡去復至者再而三故其瑣悉咸得備知先生內行則以孝事太君教課子姪爲大務尤愛賓客喜行義天啟時葛公寅亮不在官授徒西湖上學者自遠方至先生多得內交焉後入國子學游金陵所交南國之士益眾迨年已過中不遇一士旣以聲聞動千里矣一時文藝知名在人耳目者率晚生後起非奉贄幣以見則折簡以通戶外之屢常相屬也先生布几榻潔觴豆威儀抑抑左右秩秩談古今雜詩史投壺擊鼓繼日不倦至遇鄉黨姻族閒事一以身任未嘗委卸旣

任成敗如在己及遇故人若故人子扶之以危規之以義
尤加意雖其間或不能以無失要於嗜慕才賢好仗公義
本懷無負也申酉之際鄉邦盜起焚劫無虛日越數年間
奉太君避兵刃轉徙靡寧常鬱鬱不自得歎曰壯志莫售
高堂安所慰悅無何卒於旅次祥往哭之太君撫而哭曰
子見子也沒子不及見予也沒天乎乃止哭勸慰太君曰
予視茫茫而聽充充且死矣夫又三四年盜稍息諸孫奉
太君歸卒於家歲在柔兆旅食海澨溽暑為疾慨逝年之
莫追傷老成之盡謝援筆遂書若其諸軼節具載如狀茲
不贅

先世遺事

履祥遭家不造有生八年先子棄世易簣之時祥猶從羣
兒戲既聞先子歸忻然反室自謂從大人所揖誦書屬對
希果餌筆墨之授也及廚見老婢泣私問故對曰相公亡
矣駭之寢見家人羣聚而號然後疑先子亡也自此哭泣
先大父撫祥曰天乎哀哉如此之幼而喪父也然後乃信
先子之亡自此哭仆地嗚呼人至父死而猶不知也他尚
何知哉是後撫育教誨出則先大父入則先慈自飲食立
行以及守身修業與人交友之事罔不有教教罔不有淚
是以成童以往至於弱冠貧而失學有焉大過則不敢出

也年二十先大父棄世閱一年先慈又棄世痛哉天乎禍變大作助爲虐者紛紛矣維兄與祥雖貧窮困厄未嘗一日忘先教也然求能繼先人之志則亦何有今終喪者又三載於茲矣年歲日逝過失日有恐一旦遂至於不肖以大殞先德則罪孰大於此用是憶先大父先慈之言語行事或得之親授或得之傳聞書之於簡兢兢遵守庶遺教日聞猶之侍先人以無忘寡過云耳丁丑秋九月男履祥謹述

先大父曰凡作事無大小一揆之理義情庶幾無失

萬曆戊午先大人應試省闈發榜之前一日與從叔二人往天竺寺諸人以爲禱科名也一叔前聽之蓋禱大父壽云今年掃墓時叔言及此叔祖曰汝父天性至孝平時順志無論卽讀書應舉念念只在顯親壬子八月亦以鄉試在省聞母病卽束裝歸或曰試期且至病猶無恙何不終場持不可急歸侍會母病日甚尋故哀不欲生者三年乙卯服終就試至前所寓室泣然曰念昔年聞病急歸之事慘容如喪居者又周月不已也

祥襁褓時三叔祖嘗坐置懷中飲以酒及醉而嬉叔祖觀以爲樂先大人見之每日酒易縱慾勿使飲慣後不能止也聞之叔祖云憶自七歲就傅大人命受書於孫先生大

人語先生曰吾名是兒雖云與長兒名近亦欲其異日學金仁山先生也孫先生名台衡四叔冠宴客祥亦往飲既醉撻一婢穿屐獨行南田時天陰雨且晦不能歸俄鄰人有持火過者大呼之鄰人駭負之歸先大人撻之號於母母復撻曰已就先生讀書矣尙容爾如此縱恣乎自此不許陪客此祥七歲時也嗚呼痛哉今日欲得一杖之加其可得乎痛哉痛哉

萬曆己未水溢先君子已沒矣家有貯米人情震懼鄰之家欲奪先人產乃故高其價直以誘前之售主因使其求益價而陽勸止議益其價先孺人曰是弱我孤寡也價益則米且盡不益則產歸於彼矣寧失米而已產不可失也乃盡發其米如所議而去是年米價日貴先孺人艱難支給產得無恙山陰劉先生祭田記曰是皆紡績之餘也登斯田也粒粒皆辛苦也奉茲染盛醴羞也滴滴皆啼烏血也子孫念之

祥家先業素薄比先君喪益貧母延師誨祥兄弟束脩之費皆紡績所就憶冬之夜時餘二更忽忽念曰明日先生何以供膳乎計所紡木棉未及十五兩遂復紡成一斤雞既鳴矣其勞苦如此

家失雞婢得之鄰家已係之死矣婢以告先慈曰嘻令人

楊園先生全集卷之二十一
共知媪豈不大羞耶乃再與之粟且慰之曰婆子勿爲念
我家婢不曉事耳次日其子慚而怨其母是戊辰秋之事
也

祥一日濯手先慈曰盥盆中有水祥求溫者不許曰一濯
猶畏寒將何用乎終不許

先慈嘗戒曰不義之財雖得不富惟勞苦而得者久長卽
義者亦如此也汝父存日常與我將今比驗終無萬一不
驗之理

楊園先生全集卷之二十一終

楊園先生全集卷之二十一

海寧後學陳敬璋輯

弔祭告文

告先師文

歲維壬辰十月朔越二十有四日桐鄉門生張履祥以海
寧門生陳確海鹽門生吳蕃之約求遺書遺像將奉之以
歸謹修雞黍之奠致告於大明資善大夫都察院左都御
史先師念臺劉夫子之靈而以亡友孝廉祝生淵文學王
生毓著朱生昌祚周生敬可配食爲文以告曰嗚呼天下
治亂人心爲之也人心易失而難存故天下少治而多亂